

Evening Dogri News Bulletin,

17 August. 2025 .18:15 Hrs

इवनिंग डोगरी न्यूज़ बुलेटिन

Headlines

- कठुआ जिले च बद्दल फट्टने ते ल्हास-पस्सियां पौने करी 7 लोकें दी मौत, 5 जख्मी।
- उपराज्यपाल मनोज सिन्हा होरें कठुआ च होई दी कुदरती क्रोपी मगरा बचा कम्में बारै गृहमंत्री अमित शाह होरें गी जानकारी दिती।
- मुख्मंत्री उमर अब्दुल्ला होरें कठुआ जिले च बद्दल फट्टने कन्नै प्रभावित लोकें गी फौरी तौरा पर सींधी सहायता देने दा ऐलान कीता।
- सेना कमांडर लेफ्टिनेंट जनरल प्रतीक शर्मा होरें अज्ज नगरोटा च कोर गुप सुरक्षा बैठक दी अध्यक्षता कीती।
- ते मौसम विभाग नै 19 अगस्त तोड़ी जम्मू-कश्मीर च भारी बरखें ते बद्दल फट्टने दे खतरे बारै चेतावनी जारी कीती ऐ।

<><><><><><>

Kathua-Cloudburst

कठुआ जिले च अज्ज बडुलै मूहं न्हेरे बद्दल फट्टने ते ल्हास पस्सियां पौने दियें दऊं बक्ख-बक्ख घटनाएं च घट्टोघट्ट 7 लोकें दी मौत होई ते 5 होर जख्मी होई गए। आकाशवाणी दे जम्मू संवाददाता नै खबर दिती ऐ जे जिले च सारी रात बरी दी भारी बरखा बश्कार राजबाग ते जंगलोट दे घाटी ते जोध ग्राएं च कुदरती क्रोपी दा सामना करना पेआ। कठुआ दे जिला विकास आयुक्त राजेश शर्मा, प्रशासन ते पुलिस दे आला अफसरें कन्नै बचाऽ ते राहत अभियान दी निगरानी ताई घटनास्थल पर पुज्जे। बद्दल फट्टने करियै प्रभावित जोध घाटी च 5 लोकें दी जान चली गेई ते ग्रांऽ तगर पुज्जने दा रस्ता बी बंद होई गेआ। ग्रांऽ च किश घरें गी बी नुकसान पुज्जा ऐ। तोआई,

जंगलोट इलाके च बरखा कारण पेदियें ल्हास-पस्सियें च 2 लोकें दी मौत होई गई। डी.सी राजेश शर्मा होरें इस सरबंधें च जानकारी दिंदे होई दस्सेआ।

तोध घाटी थमां 5 लोकें गी अस्पताल पुजाया गेआ। इत्थे पुलिस, SDRF ते मकामी स्वयंसेवियें आसेआ सांझे तौरा पर बचा अभियान जारी ऐ। कठुआ थाना क्षेत्र दे बागड ते चांगडा ग्राएं ते लखनपुर थाना क्षेत्र दे दिलवां ते इटली च बी ल्हास-पस्सियां पौने दी खबर ऐ, पर इत्थें कुसै चाल्ली दा बड्डा नुकसान नेई होआ ऐं जिला कठुआ च बने दे हालात बारै जानकारी दिंदे होई जम्मू दे डिविजनल कमिशनर रमेश कुमार होरें आखेआ।

<><><><><><>

LG/CM-Grief

तोआई, उपराज्यपाल मनोज सिन्हा होरें इस कुदरती क्रोपी पर बसोस प्रगट कीता ऐ। इक्क सोशल मीडिया पोस्ट च श्री सिन्हा होरें दस्सेआ जे उनें केंद्री गृह मंत्री अमित शाह होरेंगी फौज, NDRF, SDRF, Police ते प्रशासन आसेआ चलाए जा'रदे बचाऽ ते राहत कम्में दी जानकारी दित्ती। गृह मंत्री अमित शाह होरें हालात दा जायजा लैने लेई लेफ्टिनेंट गवर्नर ते मुख्मंत्रि हुं'दे कन्नै गल्लबात कीती। श्री सिंह होरें केंद्र सरकारै पास्सेआ पूरे सहयोग दा भरोसा दोआंदे होई आखेआ जे सरकार जम्मू-कश्मीर दे लोकें कन्नै खडोती दी ऐ। मुख्मंत्रि उमर अब्दुल्ला होरें बी हादसे पर दुख प्रगट करदे होई बसोस जताया। उनें तत्काल राहत ते बचाऽ कम्में दे निर्देयश जारी कीते। केंद्री मंत्री डॉ. जितेंद्र सिंह होरें आखेआ जे फौज, नीम फौजी बल ते स्वयसेवियें सने होर दुइयां एजेंसियां सक्रिय तौरा पर कम्म करा करदियां न।

<><><><><><>

CM-Ex Gratia

मुख्मंत्रि उमर अब्दुल्ला होरें कठुआ जिले दे जोध खड्ड ते जुथाना सने होर दुए इलाकें च अज्ज बहल फट्टने ते ल्हास-पस्सियां पौने करियै होए दे जान-माल दे नुकसान पर गहरा दुख ते बसोस प्रगट कीता ऐ। तुरत राहत

पुजाने दे मकसद कन्नै मुख्मन्त्री होरें मुख्मन्त्री राहत कोष थमां सींधी सहायता दी घोषणा कीती। एह मदाद राज्य आपदा प्रतिक्रिया फंड थमां औने आहली मदाद थमां बक्खरी होग। दित्ते जाने आहली माली मदाद च कुदरती क्रोपी च जान जोआने आहलें दे परोआर आहलें गी 2 लक्ख, सख्त तौरा पर जख्मियें गी 1 लक्ख रपेआ ते ममूली तौरा पर जख्मी होएदे लोकें गी 50 ज्हार रपे दित्ते जाडन। पूरी चाल्ली दे नुकसान पुज्जे दे घरें गी 1 लक्ख, गंभीर तौरा पर क्षतिग्रस्त मकानें ताई 50 ज्हार ते जिनें घरें गी ममूली नुकसान पुज्जे दा ऐ, उनेंगी 25 ज्हार रपे दित्ते जाडन।

<><><><><><>

VD yatra Suspended

मौसम खराब मोसम गी दिखदे होई श्री माता वैशणो देवी अस्थापन बोर्ड नै सब्बनें पंजीकरण काउंटरें पर जात्तरा ताई पंजीकरण 2 घंटें लेई आरजी तौरा पर स्थगित करी कीता गेआ ऐ। यात्रुएं गी आधिकारिक घोषणाएं रायं अपडेट रौहने ते श्राइन बोर्ड सने मकामी प्रशासन आसेआ समें-समें पर जारी निर्देशें दी पालमा करने दी सलाह दित्ती गेई ऐ। अस्थापन बोर्ड नै भरोसा दोआया ऐ जे श्रद्धालुएं दी हिफाजत ते सहूलत पक्की करने आस्तै लोड्चदियां गेई पुट्टियां जा करदियां ना थ्होई दी ताजा जानकारी मताबक यात्रुएं दा पंजीकरण हुनै कोला किश चिर पैहले 6 बजे थमां चरणबद्द ढंग्गै नै रम्भ करी दित्ता गया ऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड्चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड्चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड्चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त

2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

ते हुन बाकि दिएं खबरें कन्नै अभिलाषा शर्मा।

Army Comdr Review

फौज दी उत्तरी कमान दे कमांडर लेफ्टिनेंट जनरल प्रतीक शर्मा होरें फौज, पुलस, सीआरपीएफ ते होरनें सुरक्षा एजेंसिं दे वरिष्ठ अधिकारिं कन्नै नगरोटा च कोर ग्रुप दी इक सुरक्षा समीक्षा बैठक दी प्रधानता कीती। इस मौके पर उ'नें खित्ते च सुरक्षा बवस्था जकीनी बनाने ते चुनौतिं कन्नै निब्वडने च बक्ख-बक्ख बलें आसेआ बनाए गेदे तालमेल ते सांझे जतनें दी सराहना कीती। उ'नें आखेआ जे जम्मू-कश्मीर च सुरक्षा सरबंधी कार्रवाईं गी निग्गर बनाने लेई बलें दा आपसी सैह्योग बडा महत्वपूर्ण ऐ।

<><><><><><>

Goga Navmi

गुग्गा नौमी दा त्यौहार अज्ज जम्मू खित्ते च बडी श्रद्धाल ते आस्था कन्नै मनाया जा करदा ऐ। हिंदू धर्म च इस त्यौहार दा बडा मता महत्व ऐ। उत्तर भारत दी केई सारी थाहरें आहले लेखा जम्मू च बी इस त्यौहार गी लोकें बडी श्रद्धा कन्नै मनाया। उधमपुर जिले च श्रद्धालुं राजा मंडलीक मंदरै च जाइयै मत्था टेकेआ। इस मौके पर थाहरें-थाहरें पर भंडारे बी लाए गेदे हे। लोकें हाल च गै किशतवाड च बहल फट्टने करी प्रभावित ते जान मुहाने आहले लोकें लेई प्रार्थना कीतियां। इस मौके पर आकाशवाणी समाचार कन्नै गल्ल करदे होई इक श्रद्धालु राघव सढौत्रत्रा नै आखेआ।

<><><><><><>

Drug Control

रामबन च दोआइयें दे नियंत्रण सरबंधी ड्रग कंट्रोल मैहकमे नै नशीली दोआइयें पर नियमें गी लागू करने आस्तै इक सख्त अभियान रम्भ कीता ऐ। इस दरान इक सांझी टीम नै मकामी दोआइयें बेचने आहिलियें दुकानें दी जांच

कीती ते नियम-कायदें दी पूरी चाल्ली पालमा यकीनी बनांदे होई दोआइयें दे रिकार्ड, स्टॉक रजिस्टर ते दोआइयें दी एक्सपायरी डेट दी बी जांच कीती। इस अभियान दा मकसद दोआइयें दे गलत इस्तेमाल ते नजैज विक्री गी रोकना हा। एहू गैऽ नशीली दोआइयें दे गलत इस्तेमाल गी रोकने ते इलाके च जिम्मेवार दोआइयें आहली प्रथा गी बढावा देना ऐ। इस सरबंधै च होर जानकारी दिंदे होई रामबन दे असिस्टेंट ड्रग कंट्रोलर संजीव कुमार गुप्ता होरें आखेआ।

<><><><><><>

Chenab-Rafting

लगातार बरा करदी भारी बरखा करियै चनाब च पानी दे स्तर च तेजिया कन्नै बाढा दर्ज कीता गेआ ऐ, इस करियै रियासी जिले च राफ्टिंग ते होर दुइयां साहसिक गतिविधियें गी आरजी तौरा पर रोक दीता गेआ ऐ। तोआई, जिले च नेकें सडकें गी नुकसान पुज्जा ऐ जिस करियै लोकें गी दिक्कतें-परेशानियें दा सामना करना पवा'रदा ऐ। जिला प्रशासन ते पुलिस नै अलर्ट जारी करदे होई आम लोकें गी दरेयाएं-खड्डें ते होर दुए खतरें आहले इलाकें च नेई जाने दी सलाह दिती ऐ। गड्डियें दी आओजाई ते लोडचदियें जरूरी सेवां गी तुरत बहाल करने आहले कम्में गी पहल दी बिनाह पर कीता जा'रदा ऐ।

<><><><><><>

Weather

मौसम विभाग नै अज्जै थमां लेइयै 19 अगस्त तगर जम्मू-कश्मीर च गरज-चमक कन्नै भारी बरखें दी चेतावनी जारी कीती ऐ। मैहकमे दा आखना ऐ जे इस दरान मौसम खराब होने करी बदल फट्टने, चानचक्क हाड आने, ल्हास-पस्सियां, कुप्पड बगैरा पौने दे असार ना। आकाशवाणी दे जम्मू संवाददाता दी जानकारी मताबक मैहकमे नै पेशगोई कीती ऐ जे जम्मू खित्ते दी कई सारी थाहरें जियां जे रियासी, उधमपुर, जम्मू, रजौरी, पुंछ, साम्बा ते कठुआ च भारी बरखा बरी सकदी ऐ जिसलै के डोडा, किशतवाड, रामबन ते कश्मीर दे कई इलाकें च तेज ब्हाएं कन्नै दरम्याने दर्जे कोला भारी बरखें दी पेशगोई कीती गेई ऐ। लोकें गी सलाह दिती गेई ऐ जे ओहू दरयाएं ते

नाले दे कंडे नेई जान। यात्रुएं गड्डी चालके ते सैलानियें गी सलाह दिक्ती गई ऐ जे मौसम दे सूरतेहाल गी ध्यानै च
रखदे होई गै अपना सफर तय करना।

<><><><><><>